

## **Nyovara Wao Paulus Po Ratoe Anugano Amisyé Mai No PILIPHI**

### *Ayao manasyin*

<sup>1</sup> Risyirati Paulus, umba Timotius tavondi tavon. Irimamo vatano irimanapatambe Yesus Kristus ai. Nyovara waowe so more irati Amisyé apa kawasae wasai tenambe wana no munijo Pilipi, weapirati wabe intabove no Yesus Kristusa nui. Muno more tavon irati wapa akarijo wo wasaugave mansai muno wapa vatano wo anugano Amisyé wasaeranande mansai tenambe.

<sup>2</sup> Kove muno saumane no no wama Injayo Amisyé muno Amisyé Yesus Kristus no wasautan tenambe.

### *Paulus apa sambaya po kove raura seo Amisyé ai*

<sup>3</sup> Risyo kove raura seo Amisyé ai arono rui vayave syo weasantona.

<sup>4</sup> Syo sambaya rave wasai tenambe tutir, ribe sambayambe inanuga ranayanambe rautan.

<sup>5</sup> Inanayanambe syo kove raura seo Amisyé ai, weye arono manasyin ride wasai kobeyoe ndea unumeso wea tavon wapo Ayao Kovo Yesus ravovo rinatavon.

<sup>6</sup> Amisyé opirati po anakero ngkove rausiso no wasanuga rai arono manasyinoe, muno syanave Ai opamo po apa anakero no wasanuga rai umaso

raijar tutira ntoa mewen no masyoto Yesus Kristus pakare rai.

<sup>7</sup> Risyo weasantontona somamo mamaisy weye inanuga no wasai rave. Muno weapamo watawondi Amisy e apa kovo po raunande rinai rai, weye wapo inaeranande arono syo Ayao Kove ravov, muno wapo inaeranande tavon arono syo ayaowe rasakinavo vatano wo Ayao Kove so raura tantunawije mansai, muno arono rimakova no tanoano makova so rai tavon.

<sup>8</sup> Weye Amisy e po raen risyamo inaemeno wasai rave, sya muinyo wasai maisyare Yesus Kristus taune muinyo wasai wemaisy.

<sup>9</sup> Risya sambaya syo rave wasai mi so: syare indamu wapa muinye miridi nseo muno wapo Amisy e aene miridi nseo tavon. Muno anakotaro rui nande wasai, syare Amisy e po wasakarikuga raniku ramu mbar,

<sup>10</sup> indamu wananta ana ngkove rai muno wabeta rai. Wirati wasanuga ngkakavimbe muno ayao kakai inta raen no wasai jeben arono masyoto Kristus pakare.

<sup>11</sup> Muno ribe sambayambe indamu wapa ana wadave ti ngkove mamu manui rave, weye Yesus Kristus po vambunine raugaje wasai. Wirati vatane wo wasaen umba ukangkamambe Amisy e ai muno wo ararimbe.

*Paulus opamo makova, weramu Ayao Kovo Yesus makova ramu*

<sup>12</sup> Sya arakove, syare wapo raen: Siurijo nande rinai somamo ama ngkove no rai. Weye wemi mbewar Ayao Kovo Yesus maneka manakoe, weti vatane wanui wo raraniv.

<sup>13</sup> Maisyare omai ti, naito nanawirati wo akar-ijo titi apa yavare raman muno vatano kaijo rui vayave una no naiso wo raen tenambe risyamo syanapatambe Kristus ai omi mbewar inausiso makova.

<sup>14</sup> Muno risya inausiso makova so mbewar arakove wanui awa anave Amisye ai miridi nseo ti wo ayao Amisye raura vambunimbe yara ujanive ramu.

<sup>15</sup> Weramu tugae, vatane inta nawirati wo ayao Kristus ravov weye uparijo rinai muno ware wo inakivan. Yara kaijinta nawamo wo ayao Kristus ravovo manuga ngkove rautan.

<sup>16</sup> Vatano manuga ngkove umaso wo ayao Kristus ravov weye umuiny irati Amisye ai muno umuinyo rinai tavon. Weye wo raen risyamo Amisye po inatayao indamu syo Ayao Kove raura kakavimbe syare omamo ayao tugae ma.

<sup>17</sup> Weramu vatane umawe onawamo manuga ngkove jeben yara ubeker usea tame rai. Weti wo ayao Kristus ravovo tugaive jeben, yara wo ravov indamu vatane wanui utavondi mai. Weye ubeker indamu risya siuri no tanoano makova so rai miridi nseo.

<sup>18</sup> Weramu wo ravovo kai, weye ama ngkove inta no rai. Awa bekere ngkakai rako ngko ndako, ana mbe mobe mamu wo ayao Kristus ravovo vatane mai. Weti inananibe, muno indati inananibe so no tawan tutir.

<sup>19</sup> Weye syo raen wapa sambaya wapo rave rinai mamu Amisye po raraniv, weti indati Yesus Kristus apa Anawayo Vambunine mo rinaer-anande indamu syuje tanoano makova so raora.

<sup>20</sup> Ana ribekero rai muno rinanave ramen dave mamu syare syo Kristus apa anakere so rajjaro matuve, vemo ana inta mo inave samaneve nora. Weti ribeker indamu inanuga so mbambunin tutir arono naiso muno miridi nto, indamu ranivara wene nande rinai rako jewena rako, weamo Kristus aijaseo titive tutir no rinai.

<sup>21</sup> Weye risyamo rino no mine vone somamo indamu ritavondi Kristus ai. Weramu kove mamu wene nande rinai indamu syoroto rituna Kristus atavon no munijo ntiti rai.

<sup>22-23</sup> Maisyare wemai ti, rui mirati syare syo ratayao rinamarom dave, syantatukambe rai: riko da rino kai no mine so rati rako, ikakai vayave rako? Ana jirume so yo rinawabe. Ribeke dave syo mine so ama rapaya indamu rituna Kristus atavon, weye wemirati ngko dave mije. Weramu ngko dave mamu riko da ino kai no mine so rati, indamu syo anakero Amisyepo raugaje rinai ama ine raen dati.

<sup>24</sup> Muno ngkovo wasai omamo rino tutiro wasarijat no mine so.

<sup>25</sup> Wemi mbewar inanuga ntindimu anakotare so rai: Syo raen indati rino tawan tutiro wasarijat tenambe indamu wapa anave ntubai mbambunin dave, muno wasananibe miridi nseo weye wapana Kristus ai.

<sup>26</sup> Weti ranivara risyakaore wasai ti wapo inaen akato, indati wapo Yesus Kristus ararimbe miridi nseo.

<sup>27</sup> Sya arakove, mbe mobe mamu wapa ana wadaveye ngko dave tenambe, mamaisyoyao Kovo Kristus mo wasanyao rai. Syare wapo raveare wemaisy indamu ranivara syakaore inande wa-

sai jakatoa rako jewena rako, indati syo ranaun weapamo wabe intabove, muno wapa bekere intabo indamu wapo anakere raijaro panyoambe indamu vatano wanui wanave Ayao Kove rai.

<sup>28</sup> Vemo wapo wapa marova wo wasave tatu-gadi masyaniv inya, yara syare wasanuga mbambunin. Ranivara wapo masyanive jewen, omamo mbe rarorombe mai wenanawamo indati Amisy po mangke raugaje mai, yara weapamo Po kovo nuge nuganuije raunande wasai.

<sup>29</sup> Weye Amisy po wasatayao indamu wapanave Kristus ai, muno obo ma jewen, yara Po wasatayao indamu wasiuri weye wapanave Ai.

<sup>30</sup> Soamo wasatawandi siurije rai maisyare muno rinamaisy. Wapo inaen risiuri no wusyinoe weye vatane wo inave tatugadi,\* muno wapo ranaun risiuri namije soamo ta no rinai.

## 2

### *Wansanuga mpaaje maisyare Kristus amaisy*

<sup>1</sup> Sya arakove, syo wasaen wasanuga mbambunin weye wabe intabove no Kristusa nui. Muno Apa muinyo wasai mo wasayove arono wasan-imaumbe. Wabe intabove wasai vambinibe weye Anawayo Vambunine mo wasaugav, muno wabekobe wasai vambinibe muno wasaemeno wapa arakove mai.

<sup>2</sup> Weti syare wapo anayanambe raugavo inanuga so rai maisyare so: syare wapa ana

---

\* **1:30** Arono wusyinoe Paulus de po Ayao Kove ravov no munijo Pilipi, akarijo munije wato wo Paulus muno apa arakovo Silas yaugave isisa tanoano makova rai (Arakov 16:19-24).

wapo ratantona intabo, wapa muinye intabo, wasanuga intabo, muno wapa bekere intabo.

<sup>3</sup> Vemo watavondi taune wapa bekero wasea tame raije rai nora! Vemo wasararin nora! Syare wasanuga mpaaje, yara wapo wapa arakovo rui vayave maijasea wapare onawamo ube mobe wasakivan.

<sup>4</sup> Vemo vatane nanentabo nyo taune nya bekere bo ratantona inya, yara syare nyo vatano kaijinta awa ratantona tavon.

<sup>5</sup> Syare wapa ana wapo ratantona muno wasanuga mammo mo Yesu Kristu apa ramaisy no taiso:

<sup>6</sup> Yesu Kristu aeno Apa ana no aije rai Opamo po Amisy amaisy,  
weramu pare Po Amisy apa titije muno Apa vambunine raijaro taune Amarome ramu.

<sup>7</sup> Yara Po apa titije rapaya ti ntuna nara de ti maisyare vatano panapatambe inta amaisy.

Apa anakea mbe vatanbe rai indamu Po vatane mansamaisy.

<sup>8</sup> Po taune anuga raveti mpaaje rave muno beto Amisy apa bekere rai ti Po anasine raunande kakai;  
beto Amisy ai tutir ava nto Apa kakaije no inyo kapite rai.

<sup>9</sup> Wemi mbewar Amisy po aijaseo titive muno Po tamo manakoe rave mo tamo kai rakivan tenambe raunande Ai,

<sup>10</sup> indamu anakotar tenambe no no naumo warae muno mine so muno mine ama ate waraya, ubeaje irati Yesu ai.

11 Muno anakotar tenambe umaso wo Yesus Kristus aura kakavimbe ware Opirati Amisy, wirati Ajayo Amisye apa kovo ntiti rararimbe!

*Wabe unanuive vatane mai*

12 Maisyare omai ti, sya arakovo inanuga no wasai, maisyare muno wabeta sya ananyaowe raive arono ino wasarijat no wusyinoe, maisyare wemai tavon syare wabeta sya ananyao rai tutir arono naiso rituna igwaravainyo wasai. Syare wabekobe indamu wapa ana wadave mamai dave, mamaisyo vatano Amisye po mapaya ayao kakai rai we mansamaisy, muno wapo Amisye asyaniv muno wabeaje Ai.

13 Weye Amisye taune wepirati po vambunine raugaje wasanuga rai, wirati indamu weapamo wabekero wabeta Ai muno wabambunin wabeta Ai mamaisyo Apa bekere rai.

14 Anakotaro rui wapo rajjar, vemo wapayaowi rai nora muno wapo nuge rapanan nora,

15 indamu ayao kakai inta raen no wasaije jeven yara wasanuga ngkakavimbe vintabo. Weapamo arikainyo Amisye nawirati weap, weramu wana no vatano ukakainoanive awa yasyine rai no mine so. Weti syare wabe unanuive mai, maisyare tumo mbaro kaumuro mine so rai.

16 Muno wapo ayaowe ravovo mai, ayao wemirati mo kovo nuge nuganuije raunande. Ranivara wapo rave tai maisy, weamo arono masyoto Kristus pakare, indati inanayanambe wasai weye sya anakero syo rajjaro panyoambe no wapa yasyine rai omamo idajjara marudi jeven, yara ama ine raen no wasai.

<sup>17</sup> Weapamo wapanave Amisy ai ti wapanap-  
atambe Ai omamo raurata irati anakotaro wapo  
rameseo Ai. Muno risyamo ranivara vatane wo  
inaubaisy ti sya mavu nsororop weye syo Ayao  
Kove ravov, wemamo maisyare ritavondi wasai  
syo anakotare rameseo Amisy ai. Weti ikakai kai,  
weramu inanayanambe muno inananibe wasa-  
tavon.

<sup>18</sup> Muno syare wasanayanambe muno  
wasananibe rinatavon.

### *Timotius muno Epaproditus*

<sup>19</sup> Ranivara Amisy Yesus po rinamayar, weamo  
indati syavave syo Timotius atutir pore wasai,  
indamu arono pakare, po wapa anakotar wadave  
ratodi ti inanuga so ranayanambe.

<sup>20</sup> Syo vatane inta aen po Timotius amaisye  
ramu. Timotius wepirati irinsanuga intabo, muno  
wepirati wapa anakotar ngkovo wasai mamu po  
ratantona tutir.

<sup>21</sup> Vatano kajjinta nawamo wo taune awa  
bekere bo ratantona, yara Yesus Kristus apa ma  
wo ratantona ramu.

<sup>22</sup> Wapo raenamo Timotius po anakero  
Ayao Kove ravove rajjaro rinatavon, maisyare  
arikainye po anakere rajjaro ajaya atavon  
wemaisy. Muno wadaen opamo tindimu Amisy  
apa anakere rai.

<sup>23</sup> Maisyare omai ti, syare syo Timotius atutir  
pore wasai arono anakotaro mare nande rinai  
mamu syo raen to.\*

---

\* **2:23** Paulus tuna no tanoano makova rai po akarijo pemerinta  
po ayao mamaisye rapatimugo aije ranyuta.



<sup>24</sup> Muno risyanave Amisy Yesus ai wepi po rina-mayar syore vave wasai tavon.

<sup>25</sup> Risyo ratantona kove mamo syo wama arakovo Epaproditus atutir pakaore wasai, wepirati wapo atutir de rinai indamu po rinaeranande. Opamo sya arakovo tavondi rinai ririmo Amisye apa anakere raijar kava muno ririmo Amisye apa marova mansopi tavon.

<sup>26</sup> Epaproditus pamo aemeno wasai rave, pare beker po wasaen akato. Opamo tuna kakai weye daniv weapo apa wanene ranaun ti wasani-maumba ai.

<sup>27</sup> Tugae, nandijawe Epaproditus gwanen dave, kavintare wene mo augav. Weramu opamo sauman akato, weye Amisye aemeno ai. Muno Amisye aemeno rinai tavon, weye ranivara sya arakove so kakai ratire, wea indati inanimaumba ntapekano rinai rave.

<sup>28</sup> Weti sya bekere manakoe indamu syo atutir pakaore wasai, indamu weapamo wasanayanambe arono wapo aen muno risyamo syo wasantotobe akatoe ramu.

<sup>29</sup> Weti syare wapo augave siso, wasanuga ranayanambe rautan, weye wepamo wapa arakov panave Kristus ai tavone piye. Syare wapo vatano maisyare arakovo Epaproditus so aije maura titive tenambe.

<sup>30</sup> Weye opamo kavintare wene mo augav weye po Kristus apa anakere raijar. Opirati de po rinaeranande, weye weapamo wagwaravainyo rinai ti taune wapo inaeranande kakai. Weramu wanene nande ai no naiso ti kavintare kakai rai.

**3**

*Wamamai no Amisyeye amune rai weye wamanave Kristus ai*

<sup>1</sup> Sya arakove weap, syare wasananibe weye wabe intabove no Amisy Yesusa nui. Ranivara ana syo raura wasai no wusyinoe ma idaura rijati akatoa, mangke rinai ramu, weye wemirati ngkovo wasai indamu vemo vatane inta wo wasaponae inya.

<sup>2</sup> Syare wasyisyaube irati vatano awa ana udave mamune mansai. Vatano nanawije mansaurata irati makeo sivuinye mai. Wo vatane mantitidi indamu utavondi sunat rai, weye ware are pirati beker siso Amisyeye apa kawasae mai, opamo tavondi sunat rai rati.

<sup>3</sup> Weramu vatane wato nawamo Amisyeye apa kawasae tugae nawa jewena, yara wamirati Apa kawasae tugae. Weye wamamo Anawayo Amisyeye ntuna wansanuga rai indamu Mo wansaugav wansambayambe Amisyeye ai. Muno Yesus Kristus apaura wansai ti wansanuga manakoeve Obo ai. Muno wamanave Yahudi awa koano maisyare sunat rai ramu, weye mo wansaugava wamamaisyoye Amisyeye amune rajije ramu.

<sup>4</sup> Weramu arono wusyinoe risiyamo syanave koano namije rai tavon. Weti ranivara vatane inta pare opamo tavondi mavabe koano Yahudi rai wirati mamai no Amisyeye amune rajioe, wepamo risiyi indati syo akivan! Weye risiyi itavono rai mavabe rave.

<sup>5</sup> Weye risyamo ritavondi sunat rai arono rinano aje kobe we, sya masyote ratora kaumandei sunative rinai. Muno risyamo vatano Israel, rinavaki no susyo Benyamin, muno risyamo vatano Yahudi vatan dave. Arono wusyinoe ibeto Ananyao Musa rai rave weye risiso no varoro Parisi rai.✧

<sup>6</sup> Muno arono naije ribekero ananyao Yahudi obo rai, weti syo arare veano vatano wanave Yesus Kristus aije mansave. Muno Ananyao Musa mammo syo inta rakanyoandi ramu, yara ribeto rai vintabo.

<sup>7</sup> Arono wusyinoe syo anakotar tenambe umaso ratantona omamo ngkovo rinai to mije. Weramu soamo syo raen syo rarijata marudi, weye syanave Kristus obo ai.

<sup>8</sup> Naisoamo syaura kovo mo kaijinta rakivane rai tenambe, wemirati syo Yesus Kristus aen, Wepirati sya Amisy. Maisyare omai ti, anakotaro wusyino syo ratantona ngkov irati rinai mammo syo rapaya vintabo to, maisyare muno vatane wo anaingkainye ramauta wemaisy. Syo rapaya ti ntami tenambe indamu ritavondi Kristus obo ai,

<sup>9</sup> muno indamu ibe intabove no Wenui. Weramu ibeto Ananyao Musa rai omi mo inaveti mamai no Amisy amune rai oma jewen, yara syanave Kristus ai obo mi mo inaveti mamai no Amisy amune rai. Weye Amisy po wansaveti wamamai no Amune rai weye wamanave Kristus ai.

<sup>10</sup> Risya bekere mammo indamu syo Kristus aen muno inanto Apa vambunino kovakato no wene

---

✧ 3:5 Arakov 26:5

ama uga raije rai. Ribeker syare itavondi Apa siurije rai muno Apa kakaije rai indamu syo amaisy.

<sup>11</sup> Weye risyamo inanave Amisyen amen wepi indati Po inaijaseo kovakato no wene rai.

*Wansatawandi tutir indamu wananta Amisyen apa kovo no no usye rai*

<sup>12</sup> Weramu anakotaro syo raura umawe mamu syo raija dainy, muno risyamo mamai dave rainy. Weramu Kristus po rinaugave siso apave rinai, weti inatawandi tutir indamu syo kovo manakoe no no usye raijar.

<sup>13</sup> Tugae, sya arakove, syo raen risyamo mamai dainya nene. Weramu sya ana syo rave mi som: syo anakotaro no no wusyinoe ratantona akatoe ramu, yara ribeke dave indamu inanto irati ana no no sya usye obo rai.

<sup>14</sup> Weti risyamo maisyare syansanan panyoambe iridi to no ama marane rai indamu syo ama ine raugav,<sup>☆</sup> omamo kovo nuge nuganui. Amisyen po inawainde no munijo ntiti indamu Po kove umaso raunande rinai weye ibe intabove no Yesus Kristusa nui.

<sup>15</sup> Arakove, syare vatano wama anave matu to wamamo wansanuga intabove wamo anakotaro syo raura umawe ratantona. Weramu ranivara vatane inta nya ana nyo ratantona nsasye, indati Amisyen po raroron kakavimbe nai.

<sup>16</sup> Weramu ngkove mamu anyanyao wandaen to ti wantavondi rai tawan ava unumeso, wemamu wantavondi rai tutir.

---

<sup>☆</sup> **3:14** 1 Korintus 9:24-27

<sup>17</sup> Arakove weap, syare sya ana syo rave mamoo wea tenambe wapo rave tavon. Munoo vatano awa ana wo rave mamaisyo reamo rave rai onawamo ube unanuive wasai tavon indamu watawondi awa ana udave ti ngko dave rai.

<sup>18</sup> Wusyinoe syo raurave wasaive to munoo soamo syo raura rijati syare: Vatano wanui awa ana wo rave mamaisye ramu, ti mo raro-ron kakavimbe onawamo ube marovave Kristus ai, ware Apa kakai no inyo kapite rai ama ine meweno rai. Aro! Mo inaveti syoyov.

<sup>19</sup> Vatano nanawije awa marane mamoo Amisye indati po mangke raugaje maija ntoa nuge nuganui. Ubekero Amisye aije ramu, yara ubekero manasine ama marinsene obo rai. Awa ana udave mbe samaneve, weramu usamane rai ramu, yara mararin dave rai. Munoo wo anakotaro mine so bo ratantona.

<sup>20</sup> Weramu wamamo wansato siso yavaruga munijo ntiti rai. Munoo Amisy Yesus Kristus, wepi no no munijo ntiti naije, Apa pakare mamoo wana ranyut. Wepirati po wansapaya wama ayao kakaije rai.

<sup>21</sup> Munoo Wepirati indati po wansanasino mayondi munoo ngkakaije so ranigwan indamu mo taune anasine ramaisy, wemi ngkovakato ti ntiti rave. Vambunino manakoe no Kristus ai indamu be akarive anakotare rai tenambe, weti indati Po apa vambunino manakoe veano wansanasine so ranigwan ti wanggwanyin.

## 4

*Ananyao maran*

<sup>1</sup> Maisyare wemai ti, syare wana tawan irati Amisy ai. Weapamo sya arakovo rimuinyo wasai muno rinaemeno wasai rave! Wapo inanuga raveti ranayanambe rave weye sya anakero no no wapa yasyine ama ine raen no wasai.

<sup>2</sup> Inya, arakovo Eudia muno Sintike! Syare ibeke dave indamu vemo ipayaowi nora! Ripamo ibe arakobe weye nanentabo ipanave Kristus ai, weti syare isanuga nsaumano vambinibe.

<sup>3</sup> Muno syo raura tavon irati sya arakovo tugae winai,\* winyirati nyo Amisy apa anakere rajaro inatavon: Syare nyo wanya umawe yaeranande indamu yo yaneme rajara yanuga nsauman akato. Weye onayamo arono wusyinoe javondi rinai, reansatawandi kobe indamu reamo Ayao Kovo Yesus ravov. Muno Klemens wepe sya arakovo kaije nawe utavondi rinaijo anakere so rai tavon. Vatan tenambe sonawamo awa tame ratoe Bukugo Kovo Nuge Nuganuije rai to. ✧

<sup>4</sup> Syare wasananibe tutir weye wabe intabove no Amisy Yesusa nui. Syo raura intabo akato: Wasananibe!

<sup>5</sup> Muno syare wabekobe irati vatane mai tenambe. Weye Amisy Yesus pakare mararai to.

<sup>6</sup> Vemo wasanuga mamauno ana inta rai nora, yara anakotaro rui vayave wadantotobe, syare wapo raura to no Amisy ai wapa sambaya rai. Wapo wapa bekedaije ranajo Ai, muno wapo kove raura seo Ai.

---

\* **4:3** Ayao Yunani no naiso mare *Sunsugos*, ama ine mare “arakova.” ✧ **4:3** Muni Akari 20:12-15

<sup>7</sup> Wea umba Amisy e apa kovo saumane mo wasanuga muno wapa ana wapo ratantona raeranande weye wabe intabove no Yesu Kristusa nui. Apa kovo saumane mamu Po raugaje manakoeve weti mo vatane wama ana wandatantona rakivan.

<sup>8</sup> Maisyare wemai ti, sya arakove, syare anakotaro rui mi ngkov ti mamaisyo wangkangkamambe rai omirati wapo ratantona tutir, no taiso: Ana tugae muno ana kovo ntiti, ana mamaisy muno ana ndandinit, muno ana manavan muno ana wamo raura titive—anakotaro syo ratodi umaso syare wapo ratantona tenambe.

<sup>9</sup> Ananyao syo raugaje wasai ti wapo raugav, syare watawondi rai. Sya ayao wapo raraniv muno sya ana idave wapo raen to mbe unanuive indamu wapo anakotaro namije rave tavon. Maisyare wemaisy, indati Amisy e apa kovo saumane no wasautan.

*Paulus po kove raura anugano Pilipi mansai weye wo aeranande apa bekedaije rai*

<sup>10</sup> Ribe intabove Amisy Yesu ai ti inananibe rave, syo kove raura seo Ai weye weapamo wasaemeno rinai ti soamo wapo inaeranande sya bekedaije rai jakato. Tugae, weapo rinatantona nugoenta to, weramu varoro wapo rinaeranande meweno wasai.

<sup>11</sup> Syo sya bekedaijo mine so ratantona jewen, weye Amisy e po rinanyao indamu inanayanambe no anakotaro rui vayave rai.

<sup>12</sup> Anakotare mewene mamu rinanto rai, muno anakotare mawese mamu rinanto rai tavon. Amisy e apa bekere mamu mba dave rinai so,

beker pare risyamo inanayanambe no anakotaro rui vayave rai. Weti arono marore nande rako, anaisyee maweso rinai rako, inanayanambe vayave. Muno sya ananuge manui rako, sya ananuge mewen dako, weamo inanayanambe.

<sup>13</sup> Anakotaro rui vayave inatawandi rai, weye Kristus wepirati po vambunine raunande rinai.

<sup>14</sup> Weapa ana wapo rave rinai mamoo ngko dave, weye weapo inaeranande risya siurije so rai.

<sup>15</sup> Sya arakovo Pilipi, arono manasyinoe syo Ayao Kovo Yesus ravovo wasai umba syuje wapa propinsijo Makedonia raora indamu syoroto munijo kaijinta rai, wapo raenamo anugano Amisy kaijinta wo doiije raunande rinaije jeben bayave, yara weabop. Tugae, wapa anugane obo mirati mo rinaeranande.

<sup>16</sup> Arono rino no munijo Tesalonika raijoe, weapo sya bekedaiije ranuture rinai to, muno wapo ranutu somamo ama susye intabo ramu yara jiruma nto mandeije rai.

<sup>17</sup> Weramu ana wapo raunande rinai omirati ribekero raije ramu, yara ana ribekero rai mamoo Amisyee po kove raugaje wasai weye wabekobeo rinai.

<sup>18</sup> Sya anakotare mamai tenambe rinai, weye wapa ana wapo ranutu ti arakovo Epaproditus po raugave mamoo po raunande rinai to. Weti soamo sya doiije, sya anaisyee mamoo mawes. Wapa ana wapo raude so mo Amisyee aveti anayanambe, raurata irati anakotaro ranavane nsainy rameseo Aije rai.

<sup>19</sup> Muno Amisyoo ibeaje ai indati Po wasaeranande tavon indamu ana inta meweno wasai



jewen, yara mamai tenambe. Opirati apaura mine so rai tenambe, weti tugae rave Po kovo manakoe raunande wasai weye weapamo wabe intabove no Yesus Kristusa nui.

<sup>20</sup> Kangkamambe wama Injayo Amisye aija nuge nuganui! Amin.

*Kovo Paulus po raura marane rai*

<sup>21</sup> Syo sya kove ranutugore Amisye apa kawasae wasai, wabe intabove no Yesus Kristusa nui. Wama arakovo utantuna rinatavone so wo kove ranutugo wasai tavon.

<sup>22</sup> Amisye apa kawasae una tenambe no naiso wo kove ranutugore wasai. Munu arakovo wo anakere raijar no Akarijo Titi Kaisar apa yavare rai wo kove raura wasai tavon.

<sup>23</sup> Wama Amisy Yesus Kristus apa kove no wasautan tenambe.

*Risy,  
Paulus*

**Ayao amisy urairi wanyin**  
**New Testament in Yawa (ID:yva:Yawa)**  
**Perjanjian Baru di Yawa**

copyright © 2011 Wycliffe Bible Translators, Inc.

Language: Yawa

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Yawa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files  
dated 29 Jan 2022

f32aa90e-2509-5f04-a3ab-17abf547cfde